

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-35-Z/23

Kakanj, 27.12.2023. godine

Z A P I S N I K

**sa 35. redovne sjednice Općinskog vijeća održane 27.12.2023. godine (srijeda)
u sali Općinskog vijeća sa početkom u 9:00 sati
(sažetak zapisnika)**

Predsjedavajući Općinskog vijeća Slaven Katičić je pozdravio prisutne i otvorio 35. redovnu sjednicu Općinskog vijeća.

Prije početka sjednice i utvrđivanja kvoruma svečanu izjavu je dao vijećnik Alen Josipović (SDA), a nakon prestanka mandata vijećniku Puščul Izudinu (SDA).

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Mediha Mamela, Džemal Bećirhodžić (naknadno pristupio), Safet Šahman, Nerma Aliefendić, Omer Musić, Namir Talić, Adis Mrkonjić, Elvir Delibašić (naknadno pristupio), Amar Selimović, Izudin Hrusto, Kenan Kozlo i Alen Josipović (**SDA**)

Vinka Aletović, Miroslav Spasojević i Edin Šljivo (**SDP BiH**)

Sabit Čehajić, Mirsad Tursum i Fakir Ajdinović (**S BiH**)

Dževdet Huskić, Marcela Ravlija i Branko Češljčić (**NS**)

Enver Merdić i Mugdin Gorak (naknadno pristupio) (**SBB BiH**)

Armin Bašić i Adnan Čobo (**DF**)

Slaven Katičić (**HDZ BiH**)

Zerina Kovač (**samostalna vijećnica**)

Mujo Fafulić (naknadno pristupio) - (**nacionalna manjina**)

Odsutni vijećnici: Mejrema Purišević (**SDA**) i Ahmed Begić (**SDP BiH**)

Predsjedavajući je konstatovao da je na sjednici u momentu prijave prisutno 24 vijećnika i vijećnica, te su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

Mirnes Bajtarević, općinski načelnik

Emir Zaimović, sekretar Općinskog vijeća – po ovlaštenju

Džihad Berbić, pomoćnik općinskog načelnika za finansije

Mirza Fazlić, pomoćnik općinskog načelnika za privredu, urbanizam i zaštitu okoline

Edin Aliefendić, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Nurudin Hrusto, pomoćnik općinskog načelnika za civilnu zaštitu

Mukades Delibašić, pomoćnik općinskog načelnika za imovinsko-pravne, geodetske poslove i katastar nekretnina

Zijad Neimarlija, direktor Zavoda za planiranje i izgradnju općine Kakanj
Mahir Sikira, šef Stručne službe za poslove Općinskog načelnika

Izjescioci, obrađivači, gosti

Sedin Karahodžić, predsjednik Komisije za utvrđivanje kriterija, postupka, načina davanja i izmjene naziva ulica, trgova...

Predstavnici medija

NTV IC Kakanj
Radio Kakanj

Napomene o radu Kolegija Općinskog vijeća

U pripremi 35. redovne sjednice Općinskoga vijeća, Kolegij Općinskog vijeća je 20.12.2023. godine, održao sjednicu na kojoj je razmatrao:

a) Prijedlog okvirnog programa rada Općinskog vijeća

Kolegij je zaključkom uputio Prijedlog okvirnog programa rada na razmatranje i usvajanje Općinskom vijeću.

b) Zahtjev MZ Povezice za promjenu naziva ulice Elvedina Šehagića u Ulicu bratstva i jedinstva ili ulicu 8.mart

Kolegij je Zahtjev uputio Komisiji za utvrđivanje kriterija, postupka, načina davanja i izmjene naziva ulica, trgova, parkova, mostova, institucija, ustanova i naseljenih mjesta na području općine Kakanj na dalje razmatranje i postupanje.

c) Zahtjev stanara ulice Varda za nastavak asfaltiranja ulice Varda

Kolegij je Zahtjev primio k znanju jer je navedeni već dostavljen općinskom načelniku i nadležnoj službi na postupanje.

d) Inicijativa mještana naselja Obre za promjenu naziva ulice Eneza Neimarlije u ulicu Obre

Kolegij je Inicijativu uputio Komisiji za utvrđivanje kriterija, postupka, načina davanja i izmjene naziva ulica, trgova, parkova, mostova, institucija, ustanova i naseljenih mjesta na području općine Kakanj na dalje razmatranje i postupanje.

e) Inicijativa Udruženja taksista „Zeleni val“ za oslobađanje od plaćanja nakanade za korištenje javne površine

Kolegij je inicijativu primio k znanju jer će se navedena razmatrati na sjednici Vijeća u okviru tačke Prijedlog odluke o izmjeni dopuni Tarifnika o visini naknade za korištenje javnih površina.

f) Zahtjev stanara zgrada ST-1, E-Stara distribucija i M-6 za uređenje prostora oko zgrada

Kolegij je Zahtjev primio k znanju jer je navedeni već dostavljen općinskom načelniku i nadležnoj službi na postupanje.

Usvajanje zapisnika sa 34. redovne sjednice Općinskog vijeća

Nije bilo diskusije o zapisniku i isti je usvojen jednoglasno sa 24 glasa ZA.

Komentari na dostavljene odgovore na vijećnička pitanja

Dževdet Huskić: je komentarisao odgovore na postavljeno pitanje ko je vršio nadzor i tehnički prijem dvorane „Anes Begić“ u općini Kakanj i ko je odgovoran za propuste u gradnji. U odgovoru Zavoda stoji da je komisija za tehnički prijem obavila pregled građevine i u zapisniku konstatovala da nema primjedbi na izvedene radove, na osnovu čega je izdato odobrenje za korištenje. Dvorana je potom data na upravljanje JU „KSC“, a ubrzo nakon toga ista je počela pokazivati propuste u gradnji u vidu prokišnjevanja i slično. Rekao je da smatra da je JU „KSC“ dovedena u nezahvalan položaj, jer je dobila

na upravljanje „neispravan“ objekat. Podsjetio je da su u gradnju dvorane uložena velika sredstva, dok očekuje da će se vrlo brzo pojaviti zahtjev za rekonstrukciju objekta i sanaciju nastale štete. Na kraju je pitao šta se poduzima kad Komisija prilikom tehničkog prijema utvrdi da je sve uredu, a ispostavi se da to nije tako, te je pitao da li ima ponovne kontrole, pozivanja na odgovornost i slično.

Komentari na dostavljena mišljenja na vijećničke inicijative

Armin Bašić: je pohvalio Zavod za žurnu realizaciju inicijative koju je podnio na prethodnoj sjednici, a koja se odnosila na sanaciju sistema odvodnje oborinskih voda pored OŠ „15. april. u Doboju. Rekao je da je taj posao pri završetku i zahvalio se Zavodu na brzom djelovanju.

Namir Talić: je komentarisao odgovore na dvije inicijative sa prethodne sjednice. Jedna je bila upućena Vladi i Skupštini ZDK, a odnosila se na osiguravanje prava na dodatak djeci bez obzira na visinu prihoda u porodici, za porodice sa troje ili više djece, kako je to riješeno u Kantonu Sarajevo. Smatra da je Vlada ZDK imala priliku pružiti podršku višočlanim porodicama i načiniti korak ka podizanju stope nataliteta, ali to nije učinila. Naime, u odgovoru stoji da općinski vijećnici nisu ovlašteni da pokreću inicijative pred Skupštinom ZDK, dok to ovlaštenje imaju građani i općinska vijeća. U tom cilju je dogovorio sastanak sa resornim ministrom na kojem će biti razgovora o iznalaženju načina za pomoć višočlanim porodicama, te je rekao da od ideje neće odustati. Uz to komentarisao je i drugu podnesenu inicijativu koja se odnosila povećanje naknade za predsjednike savjeta MZ na 200 KM mjesečno. Rekao je da su općinski načelnik i Služba prepoznali značaj iste, odnosno značaj ljudi koji vode mnoge komplicirane procese na terenu za bolje sutra svoje MZ, jer je u prijedlogu budžeta planiran nešto veći iznos sredstava za tu namjenu nego što je bio ranije, ali smatra da se radi o nedovoljnom povećanju da bi se dao puni značaj tim ljudima.

Vijećnička pitanja

Marcela Ravlija: je postavila vijećničko pitanje kada i u kojim medijima će biti objavljen javni oglas za popunu radnih mjesta u novoosnovanoj JU za razvoj i promociju turizma općine Kakanj?

Dževdet Huskić: je postavio vijećničko pitanje koliko je sastanaka savjeta mjesnih zajednica održano tokom 2023. godine? Prema informacijama kojim raspolaže postoje pojedine mjesne zajednice u kojima se savjeti uopšte ne sastaju, iako predsjednici istih uredno primaju naknadu za svoj rad.

Predsjedavajući je konstatovao da su vijećnici: Branko Češljčić, Enver Merdić, Zerina Kovač, Sabit Čehajić, Slaven Katičić, Safet Šahman i Adis Mrkonjić postavili vijećničko pitanje bez korištenja govornice.

Branko Češljčić: je postavio vijećničko pitanje zašto se Općina Kakanj nije uključila u projekte sterilizacije i kastracije pasa lotalica kao na primjer Općine Breza i Visoko? Napomenuo je da na području općine Kakanj postoji udruženje za zaštitu životinja koje je voljno pomoći u ostvarivanju pomenutih projekata, jer bi na taj način lakše i humanije riješili ovaj problem.

Enver Merdić: je postavio vijećničko pitanje da li su poduzete bilo kakave aktivnosti oko uklanjanja oborene konstrukcije džambo plakata na putu prema Separaciji? Navodi da je na putu prema Separaciji pala je jedna, a vrlo je izvjesno da će pasti i druga konstrukcija džambo plakata i to stoji već duži period, a niko ne poduzima nikakve aktivnosti, dok takvo stanje daje vrlo lošu sliku na ulazu i izlazu iz grada.

Zerina Kovač: je postavila vijećničko pitanje kojim organizacijama, udruženjima i na kojim lokacijama su dati na korištenje poslovni prostori koji su u vlasništvu Općine Kakanj?

Sabit Čehajić: je postavio vijećničko pitanje da li je moguće da se izdavanje uvjerenja/potvrda o nekažnjavanju obavlja u kraćem roku, po mogućnosti u roku od 24 sata od zaprimanja zahtjeva? Poznato mu je da je iz dosadašnje prakse Policijske stanice Kakanj da sugrađani dođu iz inostranstva i zbog pribavljanja uvjerenja/potvrde o nekažnjavanju bespotrebno ostaju i po sedam dana, što im predstavlja problem u njihovom radu.

Slaven Katičić: je postavio vijećničko pitanje da li Hidrogradnja vrši rekultivaciju zemljišta na kamenolomu „Greiben“, odnosno da li HeidelbergCement plaća naknadu za rekultivaciju zemljišta za isti kamenolom, ako plaća, kome plaća i koliko je za tu namjenu do sada uplaćeno sredstava u zadnjih 10 godina?

Safet Šahman: je postavio dva vijećnička pitanja. Prvo je da li se kroz programe u 2024. godini planira obezbjeđivanje sredstava kako bi se izvršio priključak vode na objekat ambulanta Krševac, te uređenje prostorije za namjenu apoteke? Drugo pitanje je da li će se kroz programe u 2024. godini obezbijediti sredstva koja nedostaju za projekte javne rasvjete koji su trenutno u izgradnji?

Adis Mrkonjić: je postavio vijećničko pitanje kada je planiran završetak projekta rekonstrukcije rasvjete u MZ Tršće (zamjena dotrajalih i ugradnja nedostajućih rasvjetnih tijela), uz napomenu da su sredstva planirana u Budžetu za 2023. godinu?

Vijećničke inicijative

Marcela Ravlija: je pokrenula vijećničku inicijativu da se postave jednoobrazne oglasne ploče u naseljima na području općine. Smatra da je najčešći oblik prenošenja informacija bitnih za stanovnike određenog naselja čitanje oglasa, obavještenja, osmrtnica sa oglasnih ploča. Iste su obično postavljene u centru naselja ili na prometnom mjestu, a najčešće ih postavljaju mještani naselja, tako da je jako šarolik dijapazon tih oglasnih ploča. Postavljanjem jednakih, kvalitetnih ploča uljepšao bi se izgled naselja, te bi se pokazala briga o izgledu ne samo uže jezgre grada, nego i ostalih naselja na području općine.

Safet Šahman: je pokrenuo dvije vijećničke inicijative. Prva inicijativa je da se postave dvije table sa putokazima na mjestima na području Brnjica (kod Starog doma Brnjic – Podborje – Kakanj i prije mosta Turalići – Starposle – Hrastovac – Arnauti – Zenica). Druga inicijativa je da se izvrši nasipanje (podizanje) puta koji se spaja sa „cementarskim“ i dalje za Brnjic (nova dionica – spoj na stari most), te da se konstantno vrši održavanje (zatezanje) tzv. nove trase puta kroz odlagalište. Smatra da je stanje tog dijela puta katastrofalno, te je zahtjev mještana rejona Brnjic da se izvrše popravke i obezbjeđe minimalni uslovi za odvijanje saobraćaja.

Adnana Čobo: je pokrenuo dvije vijećničke inicijative. Prva inicijativa je da se na brdu Lisine, koje se protežu u pozadini ulice Omera Maslića, uredi vidikovac, da se do istog dijelom asfaltira prilaz, a dijelom stepenice širokog raspona, te da se po ovom pitanju u Budžetu za 2024. godinu predvide troškovi za izradu projektne dokumentacije. Druga inicijativa je da se organizuje produženi boravak za djecu u prostorijama Osnovne škole u Doboju. Produženi boravak bi bio organizovan za djecu zaključno sa trećim razredom osnovne škole. U okviru ove aktivnosti trebalo bi se osnovati koordinaciono tijelo sa predstavnicima škola „Mula Mustafa Bašeskija“, „Hamdija Kreševljaković“ i „15.april“ Doboju, te drugih osnovnih škola i vrtića. Također, u osnovnim školama bi se trebali uskladiti termini nastave za djecu tog uzrasta, nakon čega bi se mogao organizovati prevoz od matične škole do Osnovne škole u Doboju koja ima uslove da organizuje ovaj produženi boravak.

Namir Talić: je pokrenuo dvije vijećničke inicijative. Prva inicijativa je da se u Odluku o subvencioniranju boravka djece u predškolskim ustanovama na području općine Kakanj uvrsti novi član kojim se definiše da pravo na subvencioniranje troškova boravka u iznosu od 50% ima svako treće i naredno dijete iz jedne porodice, bez obzira na to da li više djece iz jedne porodice pohađa vrtić u toku jedne školske godine i bez obzira na visnu primanja roditelja. Pored navedene, ponovio je inicijativu koju je podnio prema nadležnim organima ZDK na prethodnoj sjednici i predložio da se Vijeće izjasni o istoj. Radi se o inicijativi za izmjene i dopune Zakona o socijalnoj zaštiti, zaštiti civilnih žrtava rata i zaštiti porodica s djecom kojim bi se osiguralo prava na dodatak djeci bez obzira na visinu prihoda u porodici, za porodice sa troje ili više djece, sve po uzoru na Kanton Sarajevo koji je izvršio izmjenu i dopunu svog Zakona. Vijeće je jednoglasno podržalo predmetnu inicijativu sa 26 glasova, čime je ista postala inicijativa Općinskog vijeća.

Predsjedavajući je konstatovao da su vijećnici: Kenan Kozlo, Armin Bašić, Dževdet Huskić, Sabit Čehajić i Amar Selimović podnijeli vijećničke inicijative bez korištenja govornice.

Kenan Kozlo: je pokrenuo dvije vijećničke inicijative. Prva inicijativa je da se u Budžetu ZDK osiguraju sredstva za program subvencioniranja rješavanja stambenog pitanja mladih kojim će se finansijski pomoći mladima u ZDK koji prvi put rješavaju stambeno pitanje. Smatra da je rješavanje stambenog pitanja jedan od ključnih problema sa kojim se suočava naše društvo. Kako bi se stimulisao ostanak mladih na području ZDK i ublažio negativan trend odlaska mladih ljudi iz BiH, smatra da bi Vlada ZDK trebala u svoje programe uvrstiti Projekat subvencioniranja rješavanja stambenog pitanja mladih koji prvi put rješavaju stambeno pitanje. Kao primjer je naveo Kanton Sarajevo koji je izdvojio 5,5 miliona KM za tu namjenu. Druga inicijativa je da se izvrši sanacija izdignutih metalnih poklopaca na šahtovima u MZ Varda. Trenutno postavljeni šahtovi predstavljaju opasnost time što stvaraju velika udarna opterećenja koja prave štetu na vozilima iz razloga što nisu postavljeni u visini kolovoza, te ih je potrebno postaviti na visinu na kojoj kretanje vozila neće biti ugroženo. Također, smatra da je zbog navedenog otežano zimsko održavanje tih ulica.

Armin Bašić: je pokrenuo vijećničku inicijativu za adekvatno saniranje pristupnog puta u zaseoku u MZ Papratnica. Pristupni put je u jako lošem stanju i stvara velike poteškoće mještanima posebno u zimskom periodu i u periodu intenzivnih padavina kada je pristup vozilima skoro u potpunosti onemogućen.

Dževdet Huskić: je pokrenuo vijećničku inicijativu da se prilikom prvog rebalansa Budžeta planira povećanje iznosa subvencija za zapošljavanje lica na stručnom osposobljavanju i pripravnika. Imajući u vidu opći rast cijena i troškova života, smatra da bi logično bilo da se poveća izdvajanje iz Budžeta za tu namjenu, bilo iz razloga povećanja broja subvencioniranih osoba ili iz razloga povećanja iznosa kojim se ta lica subvencioniraju, a ne da se smanjuje, jer je za 2024. godinu planirani iznos sredstava manji za 40.000 KM. Smatra da je iznos od 400 KM mjesečno za pripravnike prije 5 godina bio prihvatljiv, dok je danas taj iznos ponižavajući.

Sabit Čehajić: je pokrenuo vijećničku inicijativu da se u Budžetu Općine za 2024. godinu obezbijede sredstva za subvencije roditeljima čija djeca borave u privatnim vrtićima, a plaćaju znatno veću cijenu od cijene boravka u vrtiću JU „Mladost“. Naime, zbog nedovoljnog kapaciteta u JU „Mladost“, roditelji su prinuđeni djecu slati u privatne vrtiće, pa je predložio da se subvencioniraju ti roditelji i to razlikom u cijenama između privatnih i vrtića JU „Mladost“.

Amar Selimović: je pokrenuo dvije vijećničke inicijative. Prva inicijativa je da se uredi pješačka staza-šetalište na parceli k.č.br. 2187/2 k.o. Kakanj. Druga inicijativa je da se uradi natkrivanje klupe oko stabla kod ulaza na parking marketa „ADS“ u centru grada, koje će zadovoljavati estetske i funkcionalne kriterije, obzirom da je ista neupotrebljiva jer je uvijek prekrivena ptičijim izmetom.

Utvrđivanje dnevnog reda

Predsjedavajući je za 35. redovnu sjednicu predložio dnevni red koji je usaglašen na sjednici Kolegija i predložio da se u dnevni red uvrsti naknadno pristigli materijal „Prijedlog odluke o utvrđivanju javnog interesa u svrhu polaganja komunalne infrastrukture“ (tačka 6. dnevnog reda), te bi Vijeće raspravljalo o 10 tačaka dnevnog reda.

Nije bilo primjedbi na predloženi dnevni red i isti je jednoglasno usvojen sa 27 glasova ZA.

Usvojeni dnevni red

1. Prijedlog odluke o izmjenama i dopunama Budžeta Općine Kakanj za 2023. godinu
2. Prijedlog budžeta Općine Kakanj za 2024. godinu
3. Prijedlog odluke o izvršavanju budžeta Općine Kakanj za 2024. godinu
4. Prijedlog okvirnog programa rada Općinskog vijeća za 2024. godinu
5. Prijedlog odluke o utvrđivanju javnog interesa u svrhu izgradnje lokalne saobraćajnice
6. Prijedlog odluke o utvrđivanju javnog interesa u svrhu polaganja komunalne infrastrukture
7. Prijedlog odluke o izmjeni i dopuni Tarifnika o visini naknade za korištenje javnih površina
8. Prijedlog odluke o finansiranju troškova prijevoza redovnih učenika srednjih škola
9. Prijedlog odluke o davanju naziva novoizgrađenoj ulici
10. Prijedlog odluke o vrijednosti boda komunalne naknade za 2024. godinu

1. Prijedlog odluke o izmjenama i dopunama Budžeta Općine Kakanj za 2023. godinu

Predlagač: Općinski načelnik

Obrađivač: Služba za finansije

Izjavitelj: Džihad Berbić, pomoćnik općinskog načelnik

Džihad Berbić: je predložio da Vijeće usvoji zaključak kojim se daje ovlaštenje predsjedavajućem Općinskog vijeća za potpisivanje izmijenjenog oblika Odluke o izmjenama i dopunama Budžeta Općine Kakanj za 2023. godinu, u slučaju da se Općini Kakanj do 29.12.2023. godine, uplate sredstva na ime novčane pomoći iz energetske paketa Evropske unije (EU) za energetske siromašna domaćinstva, imajući u vidu najavu Federalnog ministarstva da će sredstva biti uplaćena do kraja godine, a sve kako bi se ista mogla transferirati što prije na račune korisnika.

U diskusiji nije niko učestvovao i Vijeće je jednoglasno sa 28 glasova ZA usvojilo Odluku o izmjenama i dopunama Budžeta Općine Kakanj za 2023. godinu, kao i Zaključak o davanju ovlaštenje predsjedavajućem Općinskog vijeća za potpisivanje izmijenjenog oblika Odluke o izmjenama i dopunama Budžeta Općine Kakanj za 2023. godinu, u slučaju da se Općini Kakanj do 29.12.2023. godine, uplate sredstva na ime novčane pomoći iz energetske paketa Evropske unije (EU) za energetske siromašna domaćinstva – „Podrška Evropske unije Bosni i Hercegovini s ciljem ublažavanja negativnog socio-ekonomskog utjecaja energetske krize“.

Vijeće je vodilo objedinjenu raspravu po tačkama 2. i 3. dnevnog reda, a glasanje je obavljeno pojedinačno.

2. Prijedlog budžeta Općine Kakanj za 2024. godinu

3. Prijedlog odluke o izvršavanju budžeta Općine Kakanj za 2024. godinu

Predlagač: Općinski načelnik

Obrađivač: Služba za finansije

Izjavitelj: Džihad Berbić, pomoćnik općinskog načelnik

Džihad Berbić: je predložio da Vijeće usvoji zaključak kojim se daje ovlaštenje predsjedavajućem Općinskog vijeća za potpisivanje izmijenjenog oblika Budžeta Općine Kakanj za 2024. godinu, u slučaju da se Općini Kakanj, u januaru 2024. godini uplate sredstva na ime novčane pomoći iz energetske paketa Evropske unije (EU) za energetske siromašna domaćinstva. Ovo iz razloga kako bi se odmah po uplati sredstava ista transferirala na račune korisnika, odnosno kako se ne bi na početku godine morao vršiti rebalans Budžeta.

U diskusiji su učestvovali: Dževdet Huskić, Armin Bašić i Sabit Čehajić.

Dževdet Huskić: je rekao da je u pripremi za sjednicu vršio analizu usvajanja Budžeta u prethodne tri godine, kao i analizu podnesenih amandmana. Tom prilikom je zaključio da se pojedini amandmani ponavljaju, a imaju različito obrazloženje, te je s toga prijedlog budžeta ocojienio jednakim ili sličnim kao što je bio u prethodne tri godine. Smatra da je sačinjen po mjeri određene grupe ljudi uz istovremeno nevažavanje obrazloženja podnesenih amandmana, podsjetivši da je klub NS podnio 22 amandmana na budžet i da su svi odbijeni, kao i prethodnih godina. Naglasio je da se raduje trenutku kada će Zavod biti uvršten u trezorsko poslovanje i kada će programi sa svim projektima biti uvršteni u budžet, odnosno kada će se odmah, prilikom usvajanja budžeta, znati šta će se raditi u pojedinim MZ u toku godine. Rekao je da zna za primjere općina u Federaciji BiH koje imaju takav budžet. Na kraju je rekao da smatra da je vrijeme da predlagač počne razgovarati sa podnosiocima amandmana u cilju iznalaženja zajedničkih rješenja, koja opet imaju za cilj dobrobit svih građana i lokalne zajednice.

Armin Bašić: je sugerisao prilikom realizacije Budžeta, odnosno programa koji se donose na osnovu istog, povede računa o ravnopravnoj zastupljenosti svih MZ. Podsjetio je da je čest slučaj da pojedine MZ dobiju značajna sredstva za realizaciju infrastrukturnih projekata, dok se istovremeno za druge MZ planiraju minorni projekti.

Sabit Čehajić: je tražio pojašnjenje da li je planirano da se sredstva predviđena za ambulantu Plandište utroše na izmještanje ambulante Stara jama ili izgradnju potpuno nove ambulante Plandište.

Nakon diskusije Vijeće je sa 23 glasa ZA, 3 glasa PROTIV i 2 glasa UZDRŽAN usvojilo Budžeta Općine Kakanj za 2024. godinu uz Zaključak o prihvatanju Izvještaja o provedenoj javnoj raspravi i podnesenim amandmanima na Nacrt budžeta Općine Kakanj za 2024. godinu i Zaključak o davanju ovlaštenje predsjedavajućem Općinskog vijeća za potpisivanje izmijenjenog oblika Budžeta Općine Kakanj za 2024. godinu, u slučaju da se Općini Kakanj, sredstva na ime novčane pomoći iz energetske paketa Evropske unije (EU) za energetska siromašna domaćinstva – „Podrška Evropske unije Bosni i Hercegovini s ciljem ublažavanja negativnog socio-ekonomskog utjecaja energetske krize“, uplate u januaru 2024. godini. Vijeće je sa 23 glasa ZA, bez glasova PROTIV i 5 glasova UZDRŽAN usvojilo Odluku o izvršavanju Budžeta Općine Kakanj za 2024. godinu.

4. Prijedlog okvirnog programa rada Općinskog vijeća za 2024. godinu

Predlagač: Kolegij Općinskog vijeća

Obrađivač: Stručna služba za poslove Općinskog vijeća

Izvjestilac: Slaven Katičić, predsjedavajući Općinskog vijeća

U diskusiji nije niko učestvovao i Vijeće je jednoglasno sa 27 glasova ZA usvojilo Okvirni program rada Općinskog vijeća za 2024. godinu.

5. Prijedlog odluke o utvrđivanju javnog interesa u svrhu izgradnje lokalne saobraćajnice

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izvjestilac: Mukades Delibašić, pomoćnik općinskog načelnika

U diskusiji nije niko učestvovao i Vijeće je jednoglasno sa 26 glasova ZA usvojilo Odluku o utvrđivanju javnog interesa u svrhu izgradnje lokalne saobraćajnice.

6. Prijedlog odluke o utvrđivanju javnog interesa u svrhu polaganja komunalne infrastrukture

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izvjestilac: Mukades Delibašić, pomoćnik općinskog načelnika

Dževdet Huskić: je zamolio predlagača da ubuduće, kada se radi o utvrđivanju javnog interesa, uz materijale priloži skicu lokacije kako bi vijećnicima bilo jasnije o kojem lokalitetu se radi i kako bi imali potpuniju sliku o konkretnim aktivnostima.

Nakon diskusije Vijeće je jednoglasno sa 26 glasova ZA usvojilo Odluku o utvrđivanju javnog interesa u svrhu polaganja komunalne infrastrukture.

7. Prijedlog odluke o izmjeni i dopuni Tarifnika o visini naknade za korištenje javnih površina

Predlagač: Općinski načelnik

Obrađivač: Služba za privredu, urbanizam i zaštitu okoline

Izvjestilac: Mirza Fazlić, pomoćnik općinskog načelnika

U diskusiji nije niko učestvovao i Vijeće je jednoglasno sa 26 glasova ZA usvojilo Odluku o izmjeni i dopuni Tarifnika o visini naknade za korištenje javnih površina.

8. Prijedlog odluke o finansiranju troškova prijevoza redovnih učenika srednjih škola

Predlagač: Općinski načelnik

Obrađivač: Služba za društvene djelatnosti, boračka pitanja, raseljena lica, izbjeglice i povratnike

Izvjestilac: Edin Aliefendić, pomoćnik općinskog načelnika

U diskusiji nije niko učestvovao i Vijeće je jednoglasno sa 27 glasova ZA usvojilo Odluku o finansiranju troškova prijevoza redovnih učenika srednjih škola.

9. Prijedlog odluke o davanju naziva novoizgrađenoj ulici

Predlagač: Općinski načelnik

Obradivač: Komisija za utvrđivanje kriterija, postupka, načina davanja i izmjene naziva ulica, trgova...

Izjavitelj: Sedin Karahodžić, predsjednik Komisije

U diskusiji nije niko učestvovao i Vijeće je jednoglasno sa 26 glasova ZA usvojilo Odluku o davanju naziva novoizgrađenoj ulici „Ulica Darivalaca krvi“.

10. Prijedlog odluke o vrijednosti boda komunalne naknade za 2024. godinu

Predlagač: Općinski načelnik

Obradivač: Zavod za planiranje i izgradnju općine Kakanj

Izjavitelj: Zijad Neimarlija, direktor Zavoda

U diskusiji nije niko učestvovao i Vijeće je usvojilo Odluku o vrijednosti boda komunalne naknade za 2024. godinu, sa 22 glasa ZA, 3 glasa PROTIV, bez glasova UZDRŽAN.

Predsjedavajući je zaključio rad 35. redovne sjednice Općinskog vijeća u 10:30 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**
-po ovlaštenju-
Emir Zaimović

**PREDSJEDAVAJUĆI
OPĆINSKOG VIJEĆA**
Slaven Katičić